

## Samstarfssamningur sveitarfélaga um rekstur Skíðasvæða höfuðborgarsvæðisins

Sveitarfélögin Garðabær, Hafnarfjörður, Kópavogur, Mosfellsbær, Reykjavíkurborg og Seltjarnarnes reka í sameiningu „Skíðasvæði höfuðborgarsvæðisins“, hér eftir einnig nefnd SHB, eins og nánar er tilgreint í samstarfssamningi þessum. Samningurinn nær til starfsemi og reksturs SHB í Bláfjöllum og í Skálafelli.

Í samningi þessum er fjallað um stjórnunarleg og fjárhagsleg atriði og skuldbindingar aðila vegna þessa samstarfs.

### 1. Tilgangur, framtíðarsýn og meginmarkmið

#### 1.1. Framtíðarsýn

Sveitarfélögin hafa sett sér eftirfarandi framtíðarsýn vegna reksturs skíðasvæðanna:

- Að skíðasvæðin skapi og veiti fjölskyldum í sveitarfélögunum fjölbreytta aðstöðu og tækifæri til að njóta útiveru, hreyfingar og skemmtunar í öruggu umhverfi, og að uppeldis- og kynningarstarf sem tengist útivist, lýðheilsu og umgengni við náttúruna verði eflt.
- Að með rekstri skíðasvæðanna verði sköpuð aðstaða fyrir þá íþróttamenn sem stunda skíðamennsku sem afreksíþrótt.
- Að markviss kynning á skíðasvæðunum meðal grunnskólanema, foreldra og almennings í sveitarfélögunum verði aukin. Jafnframt verði öllum grunnskólanemum í þeim sveitarfélögum sem að rekstri skíðasvæðanna koma veittur afsláttur af aðgangi að skíðasvæðum höfuðborgarsvæðisins. Þá verði leitast við að auka upplýsingastreymi um starfsemi skíðasvæðanna, m.a. á netinu og með útgáfu kynningarefnis.
- Að lögð verði áhersla á aukna öryggis- og gæðastjórnun í öllum rekstrarþáttum og í því skyni verði á samningstímanum gerðar kannanir meðal gesta og starfsfólks um gæði starfsemi skíðasvæðanna.
- Að lögð verði áhersla á að starfsemi skíðasvæðanna sé í sem bestri sátt við umhverfið. Komið verði á verkferlum um umhverfismál þannig að tryggt sé að umgengni við náttúruna sé til fyrirmyndar. Starfsemi skíðasvæðanna skal vera til samræmis við heimsmarkmið SP.
- Að í gildi verði skýrt skipulag innviða á skíðasvæðunum, svo sem í vatns-, veitu- og skálamálum.

#### 1.2. Meginmarkmið

Meginmarkmið samningsins er að stuðla að góðri þjónustu skíðasvæðanna gagnvart iðkendum. Með samningnum er einnig leitast við að tryggja sem besta nýtingu þess fjár sem lagt er til skíðasvæðanna með langtímaákvörðunum. Í þessu felst m.a. að skíðasvæðin viðhaldi getu til að aðlaga starfsemi sína að breyttum kröfum og nýjum forsendum og að starfsfólk



skíðasvæðanna búi á hverjum tíma yfir nægjanlegri þekkingu og reynslu til að ná fram þessum markmiðum.

## 2. Eigendavettvangur, samstarfsnefnd og rekstrarfyrirkomulag

### 2.1 Eigendavettvangur skíðasvæðanna

Fulltrúar sveitarfélaganna í stjórn SSH hverju sinni mynda eigendavettvang vegna reksturs skíðasvæðanna. Á eigendavettvangi skal árlega fjallað um starfs- og fjárhagsáætlun skíðasvæðanna, sem og önnur mál er varða stefnumótun eða meiri háttar fjárhagslegar ákvarðanir sem ekki er mætt í samþykktum áætlunum. Fulltrúar úr samstarfsnefnd skíðasvæðanna skulu boðaðir á fundi eigendavettvangs eftir þörfum og eins getur samstarfsnefndin kallað eftir aðkomu að fundum eigendavettvangs í tengslum við umfjöllun um einstök mál.

Eigendavettvangurinn fær til afgreiðslu tillögur samstarfsnefndar skíðasvæðanna, sbr. gr. 2.2, um framangreint og sendir aðildarsveitarfélögunum til kynningar svo fremi að um sé að ræða áætlanir eða tillögur sem falla innan samþykktra fjárheimilda og eru til samræmis við fyrirliggjandi stefnumótun skíðasvæðanna. Leiði tillögur samstarfsnefndarinnar til aukinna fjárhagsskuldbindinga aðildarsveitarfélaganna umfram grunnforsendur fjárhagsáætlana eða feli í sér frávik frá fyrirliggjandi stefnumótun skal eigendavettvangurinn fullmóta slíkar tillögur og senda til aðildarsveitarfélaganna til samþykktar.

Fundargerðir eigendavettvangsins skulu sendar sveitarfélögunum og samstarfsnefnd skíðasvæðanna til kynningar.

Vegna ákveðinna sértækra verkefna getur eigendavettvangur sett á fót sérstaka verkefnahópa til að fylgja þeim eftir, annast eftirlit með framgangi þeirra og annast upplýsingamiðlun til eigendavettvangs og annarra hagaðila, sbr. t.d. verkefnahóp vegna uppbyggingar og reksturs skíðasvæða höfuðborgarsvæðisins. Slíkir verkefnahópar skulu halda sérstakar fundargerðir og skulu þær sendar eigendavettvangi og samstarfsnefnd skíðasvæðanna til kynningar.

### 2.2 Samstarfsnefnd skíðasvæðanna

Sérstök nefnd, Samstarfsnefnd skíðasvæða höfuðborgarsvæðisins, starfar í umboði þeirra sveitarfélaga sem aðild eiga að samningnum.

Aðildarsveitarfélögin kjósa hvert um sig einn fulltrúa til setu í samstarfsnefndinni og einn til vara. Kjörgengir til setu í samstarfsnefndinni eru allir aðal- og varamenn í sveitarstjórnnum þeirra sveitarfélaga sem aðild eiga að samstarfssamningi um rekstur skíðasvæðanna. Hver fulltrúi fer með eitt atkvæði. Ef atkvæði falla jöfn ræður atkvæði formanns. Sveitarfélögin skulu tilnefna fulltrúa sinn til setu í nefndinni að afloknum hverjum sveitarstjórnarkosningum. Formaður og varaformaður skulu kosnir á fyrsta fundi eftir sveitarstjórnarkosningar. Kjörtímabil samstarfsnefndarinnar er það sama og kjörtímabil sveitastjórnar.

Hvert sveitarfélag greiðir sínum fulltrúa fyrir fundarsetu í samstarfsnefnd skíðasvæðanna.

Meginhlutverk samstarfsnefndar skíðasvæðanna er:

1. Að móta tillögu um stefnumótun skíðasvæðanna.
2. Að móta tillögu að starfs- og fjárhagsáætlun á grundvelli stefnumótunar skíðasvæðanna, sbr. gr. 2.4.
3. Að hafa eftirlit með rekstri og fjárfestingum í umboði sveitarfélaganna.
4. Samstarfsnefnd skíðasvæðanna ásamt stjórnendum skíðasvæðanna skal hafa nána samvinnu við hagaðila skíðasvæðanna.



Halda skal fundi í samstarfsnefndinni að jafnaði einu sinni í mánuði. Fella má niður fundi í allt að tvo mánuði að sumarlagi. Þess utan metur formaður þörf fyrir frekari fundahöld. Þó skal halda fund komi um það skrifleg ósk frá stjórnarmanni. Samstarfsnefndin skal halda fundargerðabók og senda afrit af fundargerðum til eigendavettvangs skíðasvæðanna. Sviðsstjóri Íþrótt- og tómstundasviðs Reykjavíkur (ÍTR), forstöðumaður skíðasvæðanna, svo og aðrir stjórnendur ÍTR eftir atvikum, sitja fundi samstarfsnefndarinnar með málfrelsi og tillögurétt.

Fulltrúi Umhverfissviðs Kópavogs hefur heimild til setu á fundum nefndarinnar sem áheyrnarfulltrúi.

### 2.3 Rekstrarfyrirkomulag

Rekstur skíðasvæðanna svo sem starfsmannahald, fjárreiður og bókhald verður á vegum ÍTR skv. sérstökum þjónustusamningi þar um, sbr. fylgiskjal 1.

Fjárhagsupplýsingar og milliuppgjör skulu send á þriggja mánaða fresti til eigendavettvangs og aðildarsveitarfélaganna, og er það á ábyrgð ÍTR að senda þessar upplýsingar.

### 2.4 Starfs- og fjárhagsáætlanir

Samstarfsnefnd skíðasvæðanna skal fyrir 20. september ár hvert móta tillögu að starfs- og fjárhagsáætlun skíðasvæðanna á komandi rekstrarári. Skal í starfs- og fjárhagsáætlun gera grein fyrir m.a. fyrirhuguðum fjárfestingum, framkvæmdum og tillögu um gjaldskrá komandi árs. Þá skal gerð grein fyrir tillögum um opnunartíma og þjónustu á skíðasvæðunum og skulu forsendur starfs- og fjárhagsáætlunar taka mið af þeim. Fjárhagsáætlun skal ná til komandi árs og næstu þriggja ára þar á eftir. Framangreindar áætlanir skulu lagðar fyrir eigendavettvang sbr. grein 2.1.

### 2.5 Rekstrarframlög eigenda

Til að sinna þeim verkefnum sem samningurinn kveður á um skal fjárveiting til reksturs og framkvæmda á skíðasvæðunum vera í samræmi við árlega starfs- og fjárhagsáætlun og forsendur hennar, sjá fylgiskjal 1. Sveitarfélögin skipta með sér kostnaði við rekstur og framkvæmdir, þ.m.t. nýframkvæmdir, miðað við íbúafjölda 1. desember næstliðins árs. Fjárhagsáætlun skíðasvæðanna er háð samþykki á fjárhagsáætlun sveitarfélaga ár hvert.

Fyrir liggur samkomulag sveitarfélaganna um endurnýjun og uppbyggingu á mannvirkjum skíðasvæða höfuðborgarsvæðisins, dags. 7. maí 2018, ásamt síðari viðaukum og skal tekið tillit til þess við gerð fjárhagsáætlunar ár hvert.

Fyrir liggja á hverjum tíma samþykktir deiliskipulagsskilmálar fyrir skíðasvæðin. Skulu allar framkvæmdir vera í samræmi við þá skilmála.

### 2.6 Eignfærsla

Aðildarsveitarfélög SHB eru eigendur allra þeirra mannvirkja sem tengjast skíðaiðkun og eru í fólkvangi Bláfjalla og í Skálafelli að undanskildum eigum Íþróttafélaganna. Ef aðildarsveitarfélag hættir samstarfinu, getur það ekki gert kröfu um endurgreiðslu fjárfestingarframlagsins. Verði hins vegar samkomulag um að leysa upp samstarfið, skal reikna fjárfestingarframlag hvers sveitarfélags til samstarfsins frá upphafi samstarfsins, til verðlags á upplausnardegi og fá þannig eignarhlutdeild hvers sveitarfélags í þeim heildarverðmætum sem fyrir eignirnar kann að fást við sölu, eða kann að verða til skipta með öðrum aðferðum.

### 3. Starfsmannamál

Sviðsstjóri ÍTR ræður forstöðumann skíðasvæðanna að höfðu samráði við samstarfsnefnd skíðasvæðanna. Forstöðumaður fer með stjórn á öllum daglegum rekstri skíðasvæðanna. Forstöðumaður skíðasvæðanna er starfsmaður ÍTR, og næsti yfirmaður hans er sviðsstjóri. Aðrir starfsmenn skíðasvæðanna eru ráðnir af forstöðumanni og eru starfsmenn ÍTR.

Skíðasvæðin falla með sama hætti og aðrir starfsstaðir ÍTR inn í skipurit ÍTR.

### 4. Önnur ákvæði

#### 4.1. Breytingar á samstarfssamningi

Óski önnur sveitarfélög eftir því að taka þátt í samstarfi þessu, eða komi upp hugmyndir um breytingar á þessum samstarfssamningi, skal samkomulag þar að lútandi háð samþykki allra sveitarfélaganna sem aðild eiga að þessum samstarfssamningi. Sama gildir ef tillaga kemur fram um að leggja starfsemina niður og leysa upp það samstarf sem á samþykktum þessum byggir. Hvert sveitarfélag getur einhliða ákveðið að hætta þátttöku í samstarfinu að loknum þeim skuldbindingum sem sveitarfélagið hefur tekið á sig samkvæmt gildandi samstarfssamningum.

### 5. Gildistaka og endurskoðunarákvæði

Samningur þessi gildir frá og með 1. janúar 2022. Hann skal endurskoða eftir þörfum, með hliðsjón af reynslu af framkvæmd hans og þeim breytingum sem hugsanlega hafa orðið á stjórnskipulagi og stofnsamningum byggðasamlaga á höfuðborgarsvæðinu. Þá skal samningurinn endurskoðaður samkvæmt kröfu einstakra samningsaðila.

Reykjavík, 21. mars 2022

F.h. sveitarfélaga



Reykjavík



Kópavogur



Hafnarfjörður



Garðabær



Mosfellsbær



Seltjarnarnesbær